

U Sarajevu obilježen Svjetski dan autizma

O djeci s autizmom brinu samo roditelji

U BiH nema ni stručnjaka ni institucija koje se bave autizmom

Svjetski dan autizma, koji je Generalna skupština Ujedinjenih naroda utvrdila prije dvije godine, jučer je obilježen i u Bosni i Hercegovini.

U organizaciji Odbora za psihijatrijska i neurološka istraživanja Akademije nauka i umjetnosti BiH i Udruženja roditelja djece u autističnom spektru (URDAS) održana je rasprava o potrebama razvoja stručnih kapaciteta za tretman autističnih osoba.

Prepušteni sebi

O autizmu se u javnosti, pa i stručnim krugovima naše zemlje, zna veoma malo. Čak i kad otkriju da im dijete spada u autistični spektar, roditelji su prepušteni sami sebi nemajući kome obratiti se za pomoć. Osnovni problemi su, prema riječima predsjednice URDAS-a Veselinke Moric, nepostojanje stručnjaka za rad sa djecom i odraslima u autističnom spektru, nepostojanje specijalističkih servisa za ranu detekciju i intervenciju autizma, tretman i rehabilitaciju starije djece i odraslih,



Sa skupa u Akademiji nauka i umjetnosti BiH

Foto: D. TORCHE

**PODRŠKA
INSTITUCIJA**
**Podršku
borbi roditelja
jučer su dali i član
Predsjedništva
BiH Haris Silajdžić
i potpredsjednica
FBiH Spomenka
Mičić**

pružanje podrške i educiranje roditelja, te nepripremljenost odgojno-obrazovnih institucija i šire zajednice za inkluziju djece i odraslih u autističnom spektru.

U našoj zemlji ne postoji ni baza podataka o broju djece i odraslih u autističnom spektru, a prema podacima Svjetske zdravstvene organizacije, moglo bi ih biti između 3,5 i 22 hiljade.

“Mi smo prije 30 godina znali koliko imamo osoba sa

autizmom, jer su sve one bili naši pacijenti. Sad nemamo ništa, ni institucije ni kadrove koji se bave autizmom. Zato bi stručnjaci trebali dati podršku roditeljima koji su do sad u ovom bili sami“, misli Vera Daneš, šefica dječije neuropsihijatrije KCUS-a.

U raspravi je putem video-linka učestvovala i Nirvana Pišto-ljević, Sarajka i naučnica koja se na Columbia univerzitetu u New Yorku bavi autizmom.

Fali novac

Ona je URDAS-u ponudila omogućiti besplatno usavršavanje dviju stručnjakinja iz BiH, no problem je bio nedostatak sredstava kojim bi im bio plaćen put i tromjesečni boravak u SAD-u.

No, sudeći po jučerašnjoj izjavi Nadije Bandić iz Ministarstva obrazovanja FBiH, ta je institucija spremna finansijski pomoći ovaj projekat.

Podršku borbi roditelja jučer su dali i član Predsjedništva BiH Haris Silajdžić i potpredsjednica FBiH Spomenka Mičić.

J. F.